

სენსომოტორიკა, სენსომოტორული დონე -

Sensorimotor level - Сенсомоторный уровень

(ლათ. sensus აღქმა, შეგრძნება, გრძნობა + motor მამოძრავებელი)

ინდივიდის აქტივობისა და განცდის უდაბლესი დონე, რომელსაც არ სჭირდება გაცნობიერება, არ ახლავს არავითარი წარმოდგენა – მიჯაჭვულია „აქ და ახლა“ მოცემულზე, უშუალო აღქმის ველზე (შესაბამისად, არ სჭირდება მეტყველება, აზროვნება, ნებელობა). ამ დონეზე მთავარია სენსორულ-აღქმითი და კუნთურ-მოტორული ფუნქციების ურთიერთკოორდინაცია: გარედან, ანდა საკუთარი მოთხოვნილების განცდიდან, ანდა საკუთარი შიგა შეგრძნებებიდან და ფიზიოლოგიური პროცესებიდან მიღებული ინფორმაცია ზემოქმედებს სხეულებრივ მოძრაობებზე; ხოლო სივრცეში მოძრაობა, თავის მხრივ, ახალი ინფორმაციის წყარო ხდება; ეს ახალი ინფორმაცია ცვლის მოძრაობებს და ა.შ.

განწყობის თეორიისთვის მიუღებელია ასეთი უშუალო ურთიერთკავშირი (იხ. უშუალოების პოსტულატი). ფუნქციების ურთიერთკოორდინაცია გაშუალებულია ინდივიდის განწყობით; მიღებული ინფორმაცია იწვევს ჯერ განწყობის გადაყალიბებას, რაც, თავის მხრივ, ზემოქმედებს სხეულებრივ მოძრაობებზე. უკუკავშირიც ასევე განწყობის შუალობით ხდება. სწ-ზე აქტუალური განწყობა აერთიანებს და მოგვხაავს სენსორულ-აღქმით და კუნთურ-მოტორულ მდგენელებს, აგრეთვე შესაბამის დისპოზიციებს (ჩვევებს, ჩვეულებებს, უნარჩვევებს), ინსტინქტებს. ქმედებათა წარსამართავად გაცნობიერება არაა საჭირო და მაშინ ქცევა ბოლომდე იმპულსური იქნება. მაგ., ცხოველისა თუ ჩვილის ყველა ქცევა მხოლოდ სწ-ისაა და თანაც თავიდან ბოლომდე იმპულსურია. თუმცა ცნობიერი ადამიანის შემთხვევაში ქცევა უმეტესად მაინც ცნობიერდება. ძირითადად სწ-ისაა მაგ., ჩოგბურთელის ქცევა ჩოგბურთის თამაშისას; ბავშვის ლაღი გაუაზრებელი ჭყუმპალაობა ტბაში; აგრეთვე ბავშვის მიერ წყალში ბაყაყების დანახვა და შიშისგან ნაპირზე ახტომა (ამ ქცევების დროს ცნობიერება პასიურია – მიმდინარე მოქმედებებს მხოლოდ აირეკლავს). ხოლო თუკი გაცნობიერების შედეგად მოქმედებები შეიცვლება, მაშინ ქცევა გადის სწ-იდან. მაგ., თუკი ჩოგბურთელმა გააზრებულად დაიწყო თამაშის ტაქტიკის შეცვლა, ან შეეცოდა მოწინააღმდეგე და ამიტომ შეასუსტა დარტყმების ჩვეული ძალა;

ანდა თუკი ჭეუმაღლობის დროს ბავშვმა გააცნობიერა, რომ უკვე გვიანაა და ამის გამო ავიდა ნაპირზე. ეს უკვე აღარ იქნება სდ-ის ქცევები, რადგან ცნობიერების აქტიური ჩარევით იქნა შეცვლილი.